

Na osnovu člana 14. Zakona o zdravstvenoj zaštiti («Službene novine Federacije BiH», broj:46/10), člana 65. i 66. Zakona o pravima, obavezama i odgovornostima pacijenata («Službene novine Federacije BiH», broj:40/10), člana 55. i 104. Statuta Općine Ilijaš – prečišćeni tekst ("Službene novine Kantona Sarajevo", broj: 20/09 i 46/18), člana 99. Poslovnika Općinskog vijeća Ilijaš ("Službene novine Kantona Sarajevo", broj: 2/10, 18/05 i 7/19), Općinsko vijeće Ilijaš na redovnoj 30. sjednici održanoj, dana 18. aprila.2019. godine, donosi:

**ODLUKU**  
**o osnivanju Zdravstvenog savjeta na**  
**području općine Ilijaš**

**Član 1.**

**(Predmet odluke)**

(1) Ovom Odlukom osniva se Zdravstveni savjet na području općine Ilijaš (u daljem tekstu: Zdravstveni savjet), uređuje se njegove nadležnosti, broj članova i sastav, te način rada.

**Član 2.**

**(Poslovi Zdravstvenog savjeta)**

(1) Zdravstveni savjet obavlja sljedeće poslove:

- predlaže i evaluira sprovođenje zdravstvene zaštite na području općine Ilijaš,
- daje mišljenje na planove i programe zdravstvene zaštite na području općine Ilijaš, te predlaže mjere za poboljšanje dostupnosti i kvaliteta zdravstvene zaštite na području općine,
- prati primjenu propisa na području općine Ilijaš koji se odnose na zaštitu prava i interesa pacijenata,
- organizuje obrazovne kurseve za građanstvo iz poznavanja materije o pravima pacijenata i postojeće legislative,
- daje preporuke za organizaciju kurseva u zdravstvenim ustanovama radi upoznavanja rukovodstva i zdravstvenih radnika s konceptom prava pacijenata, legislativom i odgovarajućim nužnim promjenama u zdravstvenim ustanovama,
- prati povrede pojedinačnih prava pacijenata na području općine Ilijaš,
- predlaže preduzimanje mjera za zaštitu i unaprijeđenje prava pacijenata na području općine Ilijaš,
- bez odlaganja obavještava Zdravstveni savjet u Kantonalnom Ministarstvu zdravstva o slučajevima težih povreda prava pacijenata koje mogu ugroziti živote ili zdravlje pacijenata,
- obavještava javnost o povredama prava pacijenata,
- podnosi Općinskom vijeću godišnji izvještaj o svom radu,
- donosi Poslovnik o svome radu kojim se pobliže uređuje organizacija i način rada,
- obavlja i druge poslove i zadatke u skladu sa Zakonom o pravima, obavezama i odgovornostima pacijenata i Zakonom o zdravstvenoj zaštiti.

**Član 3.**

**(Zadaci Zdravstvenog savjeta)**

(1) U obavljanju poslova iz svoga djelokruga rada, zdravstveni savjet je ovlašten upozoravati, predlagati i davati preporuke.

(2) Zdravstveni savjet je ovlašten nadležnim organima državne uprave, organima lokalne samouprave, nadležnim ministarstvima zdravstva, zavodima zdravstvenog osiguranja, zdravstvenim ustanovama, privatnim praksama, komorama iz oblasti zdravstva predlagati preduzimanje mjera za spriječavanje štetnih djelovanja koja ugrožavaju prava i interese pacijenata, a posebno u situacijama kada je u pitanju otklanjanje određenih riziko – faktora za zdravlje stanovništva (vodosnabdijevanje, uklanjanje deponija i slično).

#### **Član 4.**

##### **(Broj članova Zdravstvenog savjeta)**

(1) Zdravstveni savjet na području Općine Ilijaš će brojati najmanje 9, a najviše 11 članova.

#### **Član 5.**

##### **(Učešće u Zdravstvenom savjetu)**

(1) Općinski načelnik će na osnovu Javnog poziva imenovati predsjednika i članove Zdravstvenog savjeta iz reda predstavnika:

- pacijenata
- zdravstvene ustanove OJ Dom zdravlja Ilijaš,
- Zavoda za zaštitu žena i materinstva-lokalitet Ilijaš,
- apotekarske djelatnosti iz reda registriranih apoteka sa područja općine Ilijaš,
- KJP Veterinarska stanica Sarajevo - Veterinarska ambulanta Ilijaš,
- Općinskog organa uprave iz reda zaposlenika koji se bave zdravstvenom zaštitom,
- mladih iz reda registriranog Udruženja mladih sa područja općine Ilijaš,
- Crvenog križa sa područja općine Ilijaš,
- zdravstvenih radnika iz reda privatnih praksi sa područja općine Ilijaš,
- penzionera iz reda Udruženja penzionera sa područja općine Ilijaš,
- ratnih vojnih invalida iz reda registriranog Udruženja RVI sa područja općine Ilijaš.

#### **Član 6.**

##### **(Sazivanje sjednica Zdravstvenog savjeta)**

(1) Imanovani predsjednik Zdravstvenog savjeta (od strane Općinskog načelnika), je obavezan najkasnije u roku od 30 dana, računajući od dana uručenja rješenja o imenovanju, sazvati prvu sjednicu Zdravstvenog savjeta na području općine Ilijaš.

(2) Svu tehničku i administrativnu podršku u radu Zdravstvenog savjeta na području Općine Ilijaš obavlja Služba za društvene djelatnosti i poslove mjesnih zajednica u čijoj nadležnosti je zdravstvena zaštita.

#### **Član 7.**

##### **(Čuvanje Službene tajne)**

(1) Članovi zdravstvenog savjeta u svome radu obavezni su postupati tako da ne ugroze obavezu čuvanja službene tajne.

#### **Član 8.**

##### **(Mandat i naknada)**

(1) Mandat imenovanog Zdravstvenog savjeta traje 4 (četiri) godine.

(2) Članovima Zdravstvenog savjeta pripada naknada za rad koja će se isplatiti na osnovu evidencije o učešću u radu koju Stručnoj službi Općinskog vijeća i Općinskog načelnika dostavi Služba za društvene djelatnosti i poslove mjesnih zajednica, a u skladu sa članom 5. Odluke o visini naknada vijećnicima, članovima stalnih i povremenih radnih tijela Općinskog vijeća Ilijaš ("Službene novine Kantona Sarajevo", broj: 41/07, 7/10, 44/13 i 23/17).

#### **Član 9.**

##### **(Prestanak primjene)**

(1) Danom stupanja na snagu ove Odluke prestaju da važi dosadašnja Odluka o formiranju Savjeta za unaprijeđenje zdravstvene zaštite i kvaliteta usluga, kao i promocije porodične medicine općine Ilijaš broj: 01-I-02-3644-16/05 od 29.decembra 2005. godine ("Službene novine Kantona Sarajevo", broj: 39/05).

#### **Član 10.**

##### **(Stupanje na snagu)**

Odluka stupa na snagu danom objave u "Službenim novinama Kantona Sarajevo".

## O b r a z l o ž e n j e:

### I- Pravni osnov:

Pravni osnov za donošenje ove Odluke sadržan je u članu 14. Zakona o zdravstvenoj zaštiti («Službene novine Federacije BiH», broj:46/10) koji propisuje da: "Društvena briga za zdravlje na nivou općine obuhvata ocjenjivanje rada zdravstvenih ustanova i kvaliteta zdravstvenih usluga, kao i osiguranje finansijskih sredstava za unaprijeđenje njihovog rada i kvaliteta zdravstvenih usluga u skladu sa potrebama stanovništva i mogućnostima jedinice lokalne samouprave u skladu sa posebnim zakonom o principima lokalne samouprave u Federaciji.

Društvena briga iz stava 1. ovog člana ostvaruje se osnivanjem zdravstvenog savjeta na nivou općine koji planira i evaluira provođenje zdravstvene zaštite na području jedinice lokalne samouprave, daje mišljenje na planove i programe zdravstvene zaštite za područje lokalne samouprave, predlaže mjere za poboljšanje dostupnosti i kvaliteta zdravstvene zaštite, prati povrede prava pacijenata i poduzima mjere za unaprijeđenje tih prava na svom području, te obavlja i druge poslove i zadatke u skladu sa propisima o pravima, obavezama i odgovornostima pacijenata.

Broj članova zdravstvenog savjeta određuje se statutom općine.

U radu savjeta iz stava 2. ovog člana učestvuju, po pravilu, predstavnici jedinice lokalne samouprave, pacijenata, mladih, komora iz oblasti zdravstva, stručnih udruženja, udruženja za zaštitu prava pacijenata, sindikata zdravstvenih ustanova odnosno privatnih praksi, crvenog križa sa područja jedinice lokalne samouprave." Članom 65. Zakona o pravima, obavezama i odgovornostima pacijenata («Službene novine Federacije BiH», broj:40/10) definisano je: "U cilju ostvarivanja i unapređenja prava pacijenata osnivaju se zdravstveni savjeti jedinica lokalne samouprave, kantonalnog ministarstva i Federalnog ministarstva zdravstva (u daljnjem tekstu: Federalno ministarstvo)", a članom 66. da: "Na nivou lokalne samouprave osniva se zdravstveni savjet koji broji najmanje osam članova iz reda zdravstvenih i ne zdravstvenih struka.

Prilikom osnivanja savjeta iz stava 1. ovog člana poštovaće se princip odražavanja ravnopravne zastupljenosti oba pola.

Bliže određenje broja i sastava članova zdravstvenog savjeta, mandat, način izbora, kao i način finansiranja zdravstvenog savjeta određuje se statutom općine.

Na osnovu javnog poziva, savjet iz stava 1. ovog člana imenuje općinski načelnik i to, u pravilu, predstavnika iz redova pacijenata, mladih, jedinice lokalne samouprave, komora iz oblasti zdravstva, stručnih udruženja, udruženja za zaštitu prava pacijenata, sindikata zdravstvenih ustanova odnosno privatnih praksi, crvenog krsta/križa s područja jedinice lokalne samouprave."

Članom 55. i 104. Statuta općine Ilijaš propisane su nadležnosti Općinskog vijeća za donošenje akata i drugih propisa, njihovo autentično tumačenje i utvrđivanje prečišćenog teksta.

Članm 99. Poslovnika Općinskog vijeća Ilijaš ("Službene novine Kantona Sarajevo", broj: 2/10 i 18/15) definisani su propisi koje donosi Općinsko vijeće.

### II- Razlozi za donošenje Odluke:

Programom rada Općinskog vijeća Ilijaš za 2019. godinu nije planirano donošenje ove Odluke. Inicijativu za donošenje ove Odluke pokrenulo je Ministarstvo zdravstva Kantona Sarajevo, na osnovu zastupničke inicijative iznesene na 4. sjednici Skupštine Kantona Sarajevo da se u svim općinama Kantona Sarajevo u kojima do sada nisu formirani Zdravstveni savjeti, isti formiraju u što kraćem roku.

### III- Obrazloženje pravnih rješenja sadržanih u Odluci:

Članom 1. definiše se predmet i sadržaj Odluke.

Članom 2. definisani su poslovi koje obavlja Zdravstveni savjet.

Članom 3. definisana su zadaci Zdravstvenog savjeta.

Članom 4. definišu se broj članova Zdravstvenog savjeta.

Članom 5. definiše se sastav Zdravstvenog savjeta.

Članom 6. definisano je sazivanje sjednica Zdravstvenog savjeta.

Članom 7. definisana je obaveza članova na čuvanje službene tajne.

Članom 8. definisan je mandat članova i naknada za njihov rad.

Članom 9. van snage se stavlja Odluka o formiranju Savjeta za unaprijeđenje zdravstvene zaštite i kvaliteta usluga, kao i promocije porodične medicine općine Ilijaš broj: 01-I-02-3644-16/05 od 29.decembra 2005. godine ("Službene novine Kantona Sarajevo", broj: 39/05).

Članom 10. definisano je stupanje na snagu Odluke.

#### **IV- Finansijska sredstva za provođenje:**

Finansijska sredstva za provođenje ove Odluke obezbijedit će se u Budžetu općine Ilijaš.

Predlagač Odluke je Općinski načelnik shodno odredbi člana 113. Poslovnika Općinskog vijeća Ilijaš /"Službene novine Kantona Sarajevo", broj: 02/10 i 18/15/.

Obrađivač Odluke je Služba za društvene djelatnosti i poslove mjesnih zajednica Općine Ilijaš.

Predlažemo Općinskom vijeću Ilijaš da Odluku o osnivanju Zdravstvenog savjeta na području općine Ilijaš donese u dostavljenom tekstu.

Služba za društvene djelatnosti i poslove mjesnih zajednica

U Ilijašu: 09. 04. 2019. godine